

漢文

◎送卒業生諸姊序 (舊稿)

竹田道子

天霽風暖。春光融融。遙見紅雲十里。搖曳於煙靄縹渺之中。就而觀之。瑤蕊千枝。珠葩萬朵。璀璨的礫。輝映堤下之碧流。每風自水上來。芳芬蕩勃。薰雲聚遊人。使徘徊歎絕。而不能去。是豈非墨地櫻花之壯觀。而所嘗與諸姊相俱賞游以樂焉者乎。然及一朝暴雨摧之。森風拉之。則繽紛零落。嚮之瑤蕊璀璨者。化爲泥土。而爲車轍所埋沒。嚮之珠葩的礫者。變爲塵埃。而爲馬蹄所蹂躪。紅雲十里。春光融融者。轉瞬之頃。爲荒涼悽愴之

愁景。過者或至於俯仰感慨。泣然沾襟。是豈非墨地雨後之觀。而所嘗與諸姊相俱過而傷焉者乎。嗚呼。諸姊進德修業。於此四年矣。今也學成業卒。將赴任於江湖之遠。而不復得相俱連袂提挈。而賞遊乎墨地紅雲之中也。況於雨後之觀乎。吾故臨其別。謹叙其所嘗相俱游觀者。以贈諸姊。諸姊其在天涯萬里之外。追憶曩日墨地之賞游。輒讀此篇。以當坐遊焉。彼紅雲十里之壯觀。瑤蕊珠葩之璀璨。余竊喻之於諸姊才德之美。請自愛焉。若夫雨後悽愴之觀。則諸姊必有足以慨然砥礪名節者也歟。必有足以慨然砥礪名節者也歟。

◎紀京畿游覽

(承前) 文科四年 竹田倭子

十五日、霽雨後炎威甚烈。是日爲加茂葵祭。聞葵祭者。始於欽明朝。而其儀、尤嚴正壯麗者也。厥後廢絕。至明治十八年復興之。是日黎明。勅使以下。盡會皇居。威儀極嚴。先詣上加茂祠。虔行祭祀。例、衆庶不得近觀。今我一行、便得近而觀焉。可謂異數矣。祭、始於午前九時。有內藏使代、馬寮代、看督長。服御械仗。皆用古式。進退有法。周旋中度。秩々穆然。真有千古之想。十時祭畢。於是又行下加茂祠。勅使以下。紫衣紅袍。金鞍白馬。堂々爲隊。絡繹相屬。壯麗嚴正。觀者如堵。遊銀閣寺。寺在東山。本稱慈昭寺。係夢窓國師之創始。後足利義政棲遲於此。愛其泉石。更建銀閣寺。雅潔可愛。有東求堂。安置義政像。有茶室。在其東北隅。室內裝飾。奇古而纖巧。寺僧進茶。一啜則灑然。頓忘炎熱。林泉相阿彌所

營。樹石蒼潤。有瀟灑出塵之趣。赴新黑谷。道經安樂寺、法然院。共爲塵外之名刹。行數十步。得石磴而躋。淨境別開。曰光明寺。係圓光大師之創始。而熊谷直實所遁世也。老樹蒼蔚。佛閣莊嚴。有小池。池畔老松。曰挂鐘松。傳言、直實所濯。鑲以挂斯松也。有熊谷堂、敦盛塔。其上有真如堂。正曆中、一條天皇所建。楓樹多。辭新黑谷。謁平安祠。祀桓武天皇。係明治廿七年之建設。神苑清絕。花木綺繡。有二池焉。曰蒼龍。曰白虎。寢廟翼然。如鳳翥。凡樓閣殿堂。悉倣平安之古樣。金碧粲然。與苑內白沙相映。使人悠悠追想千古之風闕。五時還旅舍。十六日霽。拜觀舊皇居。及二條離宮。例、布衣卑賤者。不得拜觀。今我一行便得之。亦異數矣。乃齋戒沐浴而發。既達皇居。則鞠躬入宮門。先拜觀紫宸殿。殿之左右。有左近櫻、右近橘。翠色可掬。殿堂潔清。間禁中太禮。皆行於此。清涼殿在其西北。歷覽畫御座、石灰壇、夜御殿、朝餉、弘徽殿等。前有吳竹